

Boazodoallu- sierra sámi ealáhus Norggas

BOAZODOALLU LEA ÁRBEVIROLAŠ SÁMI EALÁHUS Norggas, ja boazodoallu lea lágaláččat suddjejuvvon sierra sámi ealáhussan. Dat mearkaša ahte boazodoalloguohton-
guovlluin, lea boazodoallu lágalaččat ráddjejuvvon sierravuoigatvuohtan olbmuide geain lea
sámi duogáš ja geain lea gáibiduvvon gullevašvuohta boazodoallobearrašii. Odne lea sullii
2800 olbmus gullevašvuohta boazodollui Norggas.

Boazodoalloguovllut Norggas mannet ruošša rájis davvinuortan gitta Femunden-guvlui lullin-
nuortan. Norga lea juhkkjuvvon guđa boazodoallohálddašanguvlui, mat leat fas juhkkjuv-
von gávccilogiguovtti orohahkii.

Boazosápmelaččat johtet ealuideasetguin siseatnamis riddoguovlluide, ja ruovttoluotta.
Muhtimat johtet riikarájiid rastá, gaskal Norgga ja Ruota. Boazosámi servodagat leat juhkk-
juvvon siiddaide, gos mánga bearraša ovttasbarget ja johtet fárrrolagaid. Dán áigge ii leat šat
boazodoalus čielga nomádalaš eallinláhki, muhto ođasmahttojuvvon beallenomádalaš eallin-
láhki. Muhto goitge dán áigge olbmot ain johtet oktáin ealuideasetguin jahkodatjohtimiid
iešguđetge guohtunguovlluid gaskal.

Sámi boazodoallu lea dán áigge ođasmahttojuvvon ealáhus mas lea ollu mohtorfievrogeava-
heapmi ja mas geavahuvvojit teknologalaš ođasmahttimat. Muhto beaivválaš boazobargus
boazosápmelaččat ain dárbbášit ja eai birge árbevirolaš máhtu haga, maid leat oahppan ovd-
dit buolvvain, nu go movt dovdat luonddu ja movt geavahit guohtoneatnamiid molsašuddi
dálkkádagain.

Bohccobiergu lea dušše unna oasis Norgga ollislaš biergomárkanis. Bohccobiergu lea
ekologalaš ja dearvvašlaš buvttá, ja lea maid árvvus adnon danin. Boazodoallu ii leat dušše
bohccobierggu buvttadeapmi bearraša atnui ja vuovdimii, muhto das lea maid symbolalaš
árvu ja lea dehálaš oassi sámi kultuvrras. Dat lea hui mihtilmas sámi eallinláhki mii lea ollu
eambo go dušše ealáhus ja ruđalaš sisabohtu, ja dat lea maid dehálaš vuodđun sámi kul-
tuvrii.

www.reindrif.no

www.nbr.no

www.galdu.org

Samene – en håndbok, Karasjok 2003



GOVA: MIHKU SOLBAKK.